

## Uunga siunnersuut:

### Ataqqinnilluni tunniuttakkat pillugit Namminersorlutik Oqartussat nalunaarutaat

Eqqumiitsuliornermik ingerlatsineq pillugu Inatsisartut inatsisaanni nr. 11, 6. juni 2016-imeersumi § 8 a, imm. 4 aamma § 8 b, imm. 4 naapertorlugit, kingullermik Inatsisartut inatsisaatigut nr. 33, 13 juni 2023-meersutigut allangortinneqartumi aalajangersarneqarpoq:

#### *Ataqqinaammik tunniussinissamut piunasaqaatit*

§ 1. Ataqqinaammik tunniuttakkat eqqumiitsuliortup eqqumiitsuliornermini pilersitsiortugaasa pitsaassusiisa naliliiviginerisigut tunniunneqartassapput. Naliliinermi piunasaqaatit uku tunngavigineqassapput:

- 1) Inuttut pigiliussineq; Eqqumiitsuliornermi pilersitsiortukkat inuttut pigiliunneqarsimanissaat aamma takunnittoq misigissutsinik, eqqarsaatnik isumassarsianillu annertuunik imminnut akerleriittunik misissuinissamut periarfissillugu immikkut ittuunissaat.
- 2) Paasinnineq; Eqqumiitsuliornermi pilersitsiortukkat inuit akornanni, inuiaqatigiinni nunarsuarmilu paasinnitsisisinnaanissaat, atassuteqartitsisisinnaanissaat ataatsimoortitsisisinnaanissaallu.
- 3) Alapernaanneq; Eqqumiitsuliornerup silarsuarmut alapernaassuseqarnermik tunngaveqarnera aamma isumassarsianut, oqaluttuarisaanermut, piffissamut inuuffigisamut timitigullu atugassarititaasunut atatillugit eqqarsaasersorsinnaanera.
- 4) Nutaanik isumaliorneq; Eqqumiitsuliortup isumassarsiat, eqqarsaasersuutit isiginnittariaatsillu eqqarsaatigalugit nutaanik isumaliorinnaassuseqarnera, taamalu nutaanik paasisaqartitsillunilu nutaanik misilittagaqartitsisisinnaanera.
- 5) Eqqumiitsuliortarnermik ineriartortitsineq; Eqqumiitsuliap ilusaata, imaata oqaasertaliussaatalu akornanni erseqqissumik ataqatigiittoqarnera, tassani eqqumiitsuliortutut saqqummiussami eqqumiitsuliamut atatillugu immikkut "oqariartuuteqarneq" sunniiniarnerlu aamma sammisamik nutarterineq pillugit sapiissuseqarnera ilisimaarinninneralu.

*Imm. 2.* Kalaallit Nunaanni eqqumiitsuliornermut aningaasaateqarfimmi siulersuisut ataqqinaammik tunniussinissaanerpup nalilersorneqarnissaanut immikkut malittarisassaliorinnaapput, tassunga ilanngullugu eqqumiitsulioriaatsit ataasiakkaat iluini eqqumiitsuliat pitsaassusaannik naliliinissamut aalajangersimasunik malittarisassaliorinnaallutik.

#### *Eqqumiitsulioriaatsit assigiinnigitsut ataqqinaasernerneqarsinnaasut*

§ 2. Ataqqinaammik tunniussassat sisamat eqqumiitsulioriaatsit uku tunngavigalugit agguarneqartassapput:

- 1) Filmiorneq isiginnaartitsinerlu.
- 2) Assassukkanik eqqumiitsuliat ilusilersuinerlu aamma Illussanik titartaaneq.

3) Nipilersorneq assilianillu eqqumiitsuliorneq.

4) Atuakkiorneq.

*Imm. 2.* Imm. 1, nr. 1-4-ni eqqumiitsulioriaatsit sisamat pineqartut tamarmik ataqqinaammik ataatsimik tunineqartassapput.

*Imm. 3.* Ataqqinaammik tunniussaq inuttaaruppat, eqqumiitsuliortumut eqimattat pineqartut iluiniittumut tunniunneqassaaq.

#### *Isertitat naapertorlugit annertussusiliineq*

**§ 3.** Ataqqinaammik tunniussassat Eqqumiitsuliornermik ingerlatsineq pillugu Inatsisartut inatsisaanni tunniunneqartartunut aningaasat tunngaviusut naapertorlugit annertussusilerneqassapput.

*Imm. 2.* Eqqumiitsuliortut ataqqinaammik tunniussat saniatigut ukiumut 226.000 kr.-nik taakkuluunniit inorlugit isertitaqarsimasut ataqqinaammik tunniussat aningaasartaat tamarmiusut tigussavaat.

*Imm. 3.* Eqqumiitsuliortunut ataqqinaammik tunniussat saniatigut allanik 226.000 kr.-inik sinnerlugit isertitaqartunut ataqqinaammik tunniussat ikilineqassapput, taamaalillutik tunniussat isertitanut 226.000 kr.-it sinnerlugit isertitalinnut isertitaasa 75 %-iinik ikilisinneqassapput.

*Imm. 4.* Eqqumiitsuliortut ataqqinaammik tunniussat saniatigut ukiumut 434.000 kr.-nik taakkuluunniit sinnerlugit isertitaqarsimasut tunniussassat ukiumut minnerpaartaannik 19.000 kr.-usunik tunineqassapput.

*Imm. 5.* Imm. 2 aamma 3-mi aningaasatigut killiliussat aamma imm. 4-mi minnerpaamik tunniunneqartussat Procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni malittarisassat malillugit ukiunut aningaasanut inatsiseqarfiusunut tamanut iluarsineqartassapput.

*Imm. 6.* Eqqumiitsuliortup imm. 2-mit 4-mut isertitai taaneqartut Isertitat pillugit Inatsisartut inatsisaat naapertorlugit eqqumiitsuliortup akileraartussaataitaalluni isertitarai akileraartussaataitaasup isertitai ilanngullugit naatsorsuutigalugit aalajangersakkat qaqugukkulluunniit atuuttut naapertorlugit. Ataqqinaammik tunniussassat akileraartarnermut oqartussat inaarutaasumik ukiumoortumik naatsorsuutaat tunngavigalugit ukiut tamaasa ulloq 1. oktober naatsorsorneqartassapput. Akileraarutit pillugit paasisutissat eqqumiitsuliortup nammineerluni Nunatsinni Eqqumiitsuliornermi Aningaasaateqarfiup allattoqarfianut nassiutissavai.

#### *Atuutilersitsineq*

**§ 4.** Nalunaarut atuutilissaaq ulloq 15. december 2023.

*Namminersorlutik Oqartussat, ulloq xx.december 2023*

**Aqqaluaq B. Egede**

Meeqqanut, Inuusuttunut, Ilinniartitaanermut, Kultureqarnermut, Timersornermut  
Ilageeqarnermullu Naalakkersuisoq

/Nuka Kleemann